

Haethaenx cingqngamj gwn faengx seiz, bounsai gou fat sibinz daeuj, gou cam de ndaej gwn faengx lwi? De naeuz: “Mbouj miz faengx lo, ngoenzlwenz gyanghaemh faen sam aen faengx haenx hawj vunz, gwn seuq caez, gyoengqde cungj naeuz ndeigwn.” Gou riu naeuz: “Gij faengx gou son suek miz dauhleix naeuz mbouj ndeigwn ha?”

Mboengqneix dauqcawq senq nyi naeuz mou raq mou raq, ranz gou gaenq miz baenz ndwen mbouj cawx nohmou gwn gvaq. Mbouj miz nohmou guh hamh, ciet ngux nyied co’ ngux ciuqyiengh aeu suek faengx, mbouj suek faengx cix mbouj lumj ndaej gvaq ciet ngux nyied co’ ngux ne. Ranznden bouboux cungj naeuz, mbouj rox dwk maz hamh suek faengx, nohmou mbouj miz, mbouj rox baenz lawz suek, cijndei suek faengx van, couh dwg yiengh maz cungj mbouj dwk, gwn seiz gyuj di dangzhau gwn.

Gou mbouj maij gwn gij van, gig lau gwn gij van. Baj gou cam naeuz: “Baenzlawz suek, dwk maz? Couh dwk duhheu ndij.” Gou naeuz: “Miz duhdau lwi, miz duhdau couh dwk duhheu caeuq duhdau, yoengq roengzbae gyaux haeux suek couh ndaej. “Dwk gyu dwk youz lwi?” Daxbaj youh cam. “Dwk ha.” Gou naeuz, “couh lumj gaxgonq yienghneix, cij dwg noix le nohmou. Yienghneix suek gij faengx okdaeuj, youh ndei yawj hix ndeigwn ne.”

Gou daj iq couh maij gwn faengx, dauqngeix lij iq seiz, cungj dwg gvaq cieng cij miz faengx gwn. Lumj ciet ngux nyied co’ ngux ha, daxmeh gyawz ndaejhoengq suek faengx gvaq. Ndigah, ranz gou bi daengz byai cij ndaej gwn baez faengx ndeu ne. Yaeq gvaq cieng seiz, ranzranz cungj suek miz haujlai faengx, aenvih ndaw ndwencieng aeu faengx bae mbanj ha, daengx ranz vunz hix aeu gwn dem, ranz vunz noix di hix suek saek 20 gaen haeuxnah faengx. Baezbaez gat faengx seizhaenx, dou geij beixnuengx cungj gaem dawk ndwn youq henz daiz ngonz bounlaux gat faengx. Bounlaux ngamq gat ndaej, geij doiq dawk couh



coemj hwnjbae, cungj dwg bae hah faengx cungqgyang gonq, faengxgyaeuj mbouj miz vunz hah. Aenvih faengxgyaeuj mbouj miz hamh roxnaeuz hamh gig noix, dou cungj rox, faengx cungqgyang itdingh miz noh ndaw, caemhcaiq duh hix lai. Dangyienz, dou bibi cungj yiemz daxmeh suek faengx dwk hamh noix lai, nohmou gaiq mbouj gaeuq hung, dwk duh hix noix. Dou bibi yiemz, cix bibi muengh ndaej gwn faengx, ngah gwn dangqmaz.

Caengz okrog bae guh hong, gou couh laihnaeuz faengx cungj doxdoengz, cungj dwg dwk duh, nohmou guh hamh daeuj suek. Doeklaeng okbae nanz lo, cij rox dieg mbouj doxdoengz, faengx hix miz gak cungj gak yiengh, gak cungj feihdauh. Ndaw cangj ciet ngux nyied co’ ngux gvenq fat faengx, itbuen fat song aen faengx sam gak, aen ndeu dwg faengx miz noh, aen he dwg faengx cuengq miz gyaeqbit hamz. Aen faengx ndeu geij gaemz couh gwn caez, mbouj gyu mbouj youz. Mboujgvaq gou maij gwn haeuxnah, miz faengx gwn gou couh angq. Youq rog hix miz faengx gai, cungj dwg faengx sam gak iq, couh dwg haeuxnah ndwi, mwngz gag gyuj dangzhau gwn. Gou ceiq mbwq cungj gwnfap neix, ceiq lau gwn daengz dangzhau baenz naed baenz naed nyaijgyoepgyoep. Lij miz cungj ndeu vunz naeuz faengxnoh, couh dwg dwk

lauzmou gyaux haeuxnah, ndawde cuengq saek gaiq nohmou. Baez meiq roengzbae, yawjraen gij saek faengx ndaemnatnat, rwixyawj yaeq dai, yi! Lij miz cungj ndeu vunz hix naeuz dwg faengxnoh, mboujgvaq mbouj dwk lauzmou bae gyaux haeuxnah, cungj neix gou goj gwn ndaej roengz.

Gwnz haenx gangj gij faengx cungj dwg faengx lauylouh, aen iq, vei guh, yak gwn. Gou lij dwg maij faengx Gvangjsih raeuz. Faengx Gveibingz hix gvenq dwk duhheu nem nohmou suek, mboujgvaq duhheu mbouj dwg dwk baenz naed, dwg dawz bae duet byak gvaq, vunz naeuz dwk duh baenz naed nyapnyadnyad, mbouj ndeigwn. Caemhcaiq, dwk duh dwk lai bw, 6 gaen haeuxnah aiq dwk baenz yaeq 3 gaen duhheu. Baez gat faengx seiz yawjraen hamh caeuq haeux cungj ca mbouj lai. Gou maij gwn cungj neix. Gveibingz lij maij suek cungj faengx dem, heuhguh faengx raemxdaeuh. Couh dwg dawz nyangfiengz daeuj coemh baenz daeuh le, dwk daeuh cuengq ndaw raemx bae cimq gvaq, caiq daih aeu gij raemxsaw seuq dawz daeuj cimq haeuxnah. Gij haeuxnah aeu raemxdaeuh cimq gvaq, haeuxnah bienq ndaej henjswdswd, ndei yawj. Suek cungj faengx neix gig vaiq, yiengh ndeu mbouj dwk, suek aen iqet dwg faengxlgw, ceiq hab lwnyez cimz lo. Gwn seiz cij gyuj dangzhau baenz

naed soengq gwn, vunz bounlaux naeuz cungj faengx neix singq liengz, mbouj lau gwn le ndang ndat.

Gou youq rog ndaej gwn faengx ndeigwn gvaq, dangyienz dwg faengx Gvangjsih raeuz, dwg faengx Hozciz. Hix dwg dwk noh nem duh guh hamh, hoeng gij faengx feihdauh gig daegbied, miz cungj heiq rang daegbied ndeu, caemhcaiq ngaiz haeuxnah hix daegbied miz feihdauh, fanjcingq dwg gij faengx gou gwn gvaq ceiq baenz gwn, caen dwg gaemzgaemz cungj rangfwdfwd, yied nyaij yied raen ndeigwn. Baengzyoux naeuz, faengx gyoengqde feihdauh daegbied miz song aen yenzynh: It dwg gyoengqde cuengq miz go doenghyiengh muz nyaeq gyaux haeuxnah, cungj doenghyiengh neix miz feih rang; ngeih dwg gij faengx gyoengqde cungj dwk roengz raemx bae dumq daengz cug, gij faengx dou cix dwg cuengq gwnz aen’ gyaq bae naengj daengz cug, aeu naengj baenz hwnz baenz ngoenz bae.

Seizneix ciet ngux nyied co’ ngux gvaqbae lo, youq neix dwen faengx, gou youh hozgyaez siengj gwn faengx lo. Faengx seizlawz ceiq ndeigwn ne? Gou nyinhnaeuz gag mwngz miz faengx seiz gwn ceiq van. Caengz gvaq ciet, gag ranz mwngz ndaej gwn ceiq gonq, bounwnq caengz miz faengx gwn, seizde faengx caen ndeigwn bw; lij miz gaenq gvaq ciet geij ngoenz, mwngz cij gwn faengx, danghnaeuz bounwnq mbouj miz faengx gwn, seizneix gwn faengx, daegbied miz feihdauh! Sou saenq lwi? Mbouj saenq? Sawqsawq yawj, lumjnaeuz seizneix suek faengx, itdingh ndeigwn!



•Sawcuenhvaez Lwngnyez•

Gij Golwngnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

“De gig rox yaeuh vunz.” Gou baez naengh youq gwnz rinbanj mbaeklae naj ding, ngiengxyawj daiq naeuz: “Haxbaenh dou youq ndaw dah youzraemx, de lox dou gangj miz duz ngwzboengz hung he.”

“De couh rox gaemh duzngwz.”

“Daxdaiq, Aulungzgeiz rox gaemh duzngwz, mbouj dwg vunzndei ha?”

“Vunzndei baenzlawz rox bae

gaemh duzngwz.”

“Duzngwz rox haeb vunz, dwg duzhaih, de gaemh duzngwz, wnggai dwg vunzndei ba.”

“Lwngnyez mbouj roxsoq, lij euqvang.”

Gou gig mbouj fug. Aulungzgeiz youq ndawsim gou, yienznaeuz gou mbouj daiq maij de, hoeng cungj roxnyinh de gig ndeimaenz, gig ndeiriu, hix gig gyoh, boun dog youq aen

ranznamh youh daemq youh ndaem laeng miuhsaenzvangz, byawz hix mbouj gamj byaij haeujbae yawj ndaw ranz de miz maz huq baij, seiqgeiq daengx bi cungj ndaej baengh gyoengq vunzmbanj hawj de guh di hongngoenz, cij miz saek donq haeux gwn, cawz le lwngnyez ciengzseiz riu angq daeuq de, ndaw mbanj gyoengq vunzchung mboujlwnh bounsa mehmwbk, lumjnaeuz mbouj byawz yawj

ndaej hwnj de, ndigah hawj gou gig doengzcingz de, yienznaeuz de ciengzseiz loengh gou, haep gou.

“Danghnaeuz de dwg vunzndei, hix mbouj rox baenzneix baihsaiq lo.” Daxdaiq cit gaemz ien ndeu, gij sing de caeuq hoenz ien caemh daj ndaw bak byoq okdaeuj.

“Neix dwg aenvih cojcoeng de mbouj miz reihnaz gyacanjan ce hawj de.” Gou youh euqvang lo: “Danghnaeuz de miz 10 moux reihnaz, 20 moux suenmak, lauheiq caezgya hix mbouj rox yienghneix yawj mbouj hwnj de lo.”

“Hei! Ranz de bonjlai hix mbouj yaez, gyauejdah miz geij moux naz, hix miz fungh ranz he.” Daiq gaem doengzien, nap ceijdwkfeiz, danqheiq naeuz.

(caengz sat)